

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA LAITI
8 - 10



Ianuari - Iuni
2020

ASO SA: FEPUARI 02, 2020

MATAUPU 1: O LE FANAU A ATAMU MA EVA.

SINI: Ia malamalama tamaiti, o le fanau a Atamu ma Eva o ulua'i tagata o le foafoaga.

TUSI FAITAU: Kenese 4: 1-7 & 25-26

TAULOTO: Kenese 4: 4-5. *“A o Apelu, ua ia avatu foi ulua'i tama a lona lafu, o e pepeti ai lava. Ua silaisila mai le Atua iā Apelu, atoa ma lana taulaga; a e peitai o Kaino ma lana taulaga, ua ia lē silaisila i ai.”*

FESOASOANI MO FAIAOGA:

Malo le soifua manuia i ā outou Susuga i faiaoga i le amataga o lenei tausaga fou. Fautua atu ma le fa'aaloalo i ā outou Susuga le fa'amalosia o le faitaugā Tusi Paia a le fanau aemaise le fa'amalamalamaina o upu e lē o malamalama ai le fanau. Amata i nai fesili e tatala ai mafaufau o fanau i tagata masani ia o le foafoaga.

1. O ai le tamaitiiti na te iloaina le tagata lenei o Atamu?
2. O ai e iloa le tagata e igoa ia Eva?
3. O ai e manatuaina, e toafia foi le fanau a Atamu ma Eva?
4. O ai e matua, a o ai foi e laitiiti?
5. Ia lelei tele outou tamaiti, ia nofo sa'o i luga ma fa'alogo lelei mai lava, e i ai le fa'aopoopoga o le tala i le fanau a Atamu ma Eva lea o le ā tatou talanoa ai i lenei taeao.

FESOASOANI MO LE MATAUPU:

O Atamu ma Eva o ulua'i tagata o le foafoaga, o le ulugāli'i, e to'atolu le lā fanau.

1. **Kaino** -O le ulumatua i le fanau a Atamu ma Eva. O le uiga o lona igoa o **“maua”** [ua maua le fanau a Atamu ma Eva mai le Alii]. O ia o le galue fanua – fai-fa'atoaga [e i ai togā laau aina, togā fa'i, ma'umaga, ma isi.] Sa ia agaleaga i lona uso o Apelu ina ua osi a la taulaga i le Alii. Na fa'asalaina e le Atua ina ua ia fasiotia lona uso o Apelu ona o le leaga o lona loto; o lona tau i le fa'asevasevaloina ma maumau solo, o lona uiga ua leai se fa'asinomaga. O Kaino e lē o se tagata fai mea lelei. Peita'i ona o le Atua e alofa na tu'u avanoa ia Kaino. Na lē talia lana taulaga e le Alii, ona ua ia lē filifili i ulua'i fua lelei o lana fa'atoaga, a ua fai lava tau ina fa'ataunu'u, a ua leai se faia mo le vi'iga o le Atua.
2. **Apelu** -O ia o le lona lua i le fanau a Atamu ma Eva. O le uiga o lona igoa **“mānava po'o le atalii”**. [breath or son]. O lana galuega fa'atino i totonu o lo latou aiga, o le leoleo i lafu manu; [e i ai lafu mamoe, lafu povi, ma isi.] O Apelu o se tagata loto mama, agamalu, ma fai mea lelei; na talia lelei e le Atua lana taulaga na osia i manu pepeti mai i le lafu, o ulua'i tama a lona lafu. Sa agaleagaina o ia e lona uso matua o Kaino, ma fasioti ai o ia, ma tanu i le eleele.
3. **Setu** -O le fanau lona tolu a Atamu ma Eva. O le uiga o lona igoa **“tofia”**. O ia o le sui-tulaga i lona uso o Apelu ina ua maliu o ia.

Uiga o Upu:

1. **Fa’asevasevaloaina:** o lona uiga ua fealua’i solo pei se tagata ua leaga le ulu, ua ola fua, a ua leai se uiga e ola ai.
2. **Kaino:** o lona uiga o “maua”. [f. 1. Ua ou maua le tagata mai le Alii].
3. **Setu:** o le uiga o lona igoa o “tofia”. [f. 25. Ua tofia mai e le Atua ia te a’u le tasi tama o le sui o Apelu.
4. **Fa’aūū:** o lona uiga o le fa’anoanoa po’o le lē fiafia o mata po’o foliga, ua ita.
5. **Maumau solo:** e le mautonu po’o fea e nofo ai, ua lē mau i se mea e tasi. (homeless)
6. **Apelu:** mānava po’o le atali’i.

Galuega Fa’atino: [Fesili ma Tali]

1. O ai le ulumatua o le fanau a Atamu ma Eva; a o le ā foi le uiga o lona ioga?
- O Kaino o le ulumatua – o le uiga o lona igoa o “**maua**”.
2. O ai na fai ma sui o Apelu ina ua oti o ia; a o le ā foi le uiga o lona igoa?
- O Setu – o le uiga o lona igoa o “**tofia**.”
3. O ai le tagata e leoleo i lafu manu?
- Apelu
4. Aiseā na lē talia ai e le Atua le taulaga a Kaino? – Ua ia lē filifili i ulua’i fua o lana fa’atoaga e osi ai le taulaga, a ua fai lava tau ina fa’ataunu’u.
5. A fai sau taulaga mo le Atua, o le ā le mea e tatau ona e faia? – Ia fai lava i le mea e aupito silisili ona lelei iā te oe.

PESE: O lima galue ma vae momo’e.

1. O lima galue ma vae momo’e
Meaalofa a le Atua mo a’u ma oe
O lima galue ma vae momo’e
E fesoasoani i le aso atoa

Hands to work and feet to run
God’s good gift for you and me
Hands and feet He gave to us
To help each other the whole day through

2. O mata e va’ai taliga e fa’alogo
Meaalofa a le Atua mo a’u ma oe
O mata e va’ai taliga e fa’alogo
E fesoasoani i le aso atoa

Eyes to see and ears to hear
God’s good gift for you and me
Eyes and ears He gave to us
To help each other the whole day through

A’OA’OGA:

1. Ia fa’aaoga lou malosi e fesoasoani ai i ou mātua i fe’au fai o lo outou aiga.
2. Ia manatua o le Atua e afua mai ai le ola ma le malosi o lo’o ua tatou maua i aso uma.
3. Aua nei e tau ma sui i le isi o ou uso, aua le loto leaga pe ā lelei ma fa’amanuiaina mea e faia e le isi tagata.
4. A ē faia se mea e ta’u ai le Atua, ia fai i le lelei e gata ai lou fai mea lelei, ia fa’apenā foi ona fai i si tagata.
5. Fa’aopoopo e lau Susuga nisi a’oa’oga tāua mo le fanau fa’amolemole.

TATALO: Fa’afetai le Atua i lau fa’asoa i lenei taeao. Ua matou maua ai tamāoaiga o le agaga e fa’amalosia ai lo matou ola fa’atuatua....Amene.

*******Ia manuia outou le fanau i lenei Aso Sa*******

ASO SA: FEPUARI 09, 2020

MATAUPU 2: O LE FANAU A NOA

SINI: Ia a'oa'o le vasega ia malamalama, o le fanau a Noa na ainā ai le lalolagi uma.

TUSI FAITAU: Kenese 9:18-29

TAULOTO: Kenese 9:18-19 "*O atalii foi nei o Noa e na ulufafo i le va'a, o Semu ma Hamo, ma Iafeta, o Hamo foi o le tamā ia o Kanana. O atali'i nei e to'atolu o Noa; o i latou foi na ainā solo ai le lalolagi uma.*"

FESOASOANI MO FAIAOGA:

Malo le soifua i ā outou Susuga i faiaoga. O nai fesoasoani foi nei mo le tapenaina o le tatou mataupu i lenei Aso Sa. Fa'amalosia pea le faitau Tusi Paia a le fanau aemaise ni upu faigatā o lo o i le tusi faitau, e ao ona fa'amalamalamaina. Fautua atu lava, ia lava sou taimi e te faitau ai i le tala, o le ā faigofie ai lau galuega, i le fesoasoani mai o le Agaga Paia. E lelei pea pe ā lē noatia le faitau ma sa'ili'ili i fuaiupu ua tu'uina atu, ae ia fa'atele pea le faitau i le tala mai lona amataga, e 'oa ai ou manatu. Ia fai ni fesili faigofie e tata'i ai mafaufau o le vasega i le mataupu a'o le'i fa'amatalaina le tala. Ia manuia tele le tapenaga.

1. O ai foi na fauina le va'a? Tali: O Noa.
2. E to'afia tagata na o i le va'a? E to'avalu.
3. E to'afia foi tagata na fa'asaoina mai le lolo? E to'avalu.
4. O ai ia tagata? O Noa ma lana avā, o lana fanau e to'atolu, ma avā a lana fanau.
5. E toa fia le fanau a Noa? E to'atolu.
6. E fia tausaga o Noa ae oti o ia? E 950 tausaga.
7. E fia tausaga na ola ai Noa ina ua uma le lolo? E 350 tausaga.
8. Ia toe fa'ailoa le mataupu o lenei taeao i le vasega a o le'i fa'amatalaina.

FESOASOANI MO LE MATAUPU:

O Noa e to'atolu ona atalii. O i latou nei, o Semu, o Hamo ma Iafeta. O i latou foi nei na fa'ata'ape'ape ma salalau solo i itu uma o le lalolagi. O atalii o Iafeta, sa salalau solo i nu'u tu matafaga. O nu'u ua tu lata i le sami Metiterani i Asia ma Europa, ona gasolo lea i le itu i matū o Europa. Ua ta'ua i latou o tagata sisina po o tagata papa'e. O atalii o Hamo, na gasolo i le itu i Saute. Sa salalau foi isi i nu'u o Kanana, Filisitia ma Aikupito, ua ta'ua i latou o tagata uli. O atalii o Semu, na tutupu ai nu'u 'ese'ese o Asia, aemaise o tagata Isaraelu; o tagata e'ena i latou, e pei o tatou i Samoa ma nisi o atunu'u o le Pasefika.

O le fuaiupu e 8 – 17, o loo faamatalaina ai e le tusitala fa'amanuiaga a le Atua iā Noa ma lana fanau, e ala i le feagaiga na osia ma le Atua. E lē toe i ai se lolo i le lalolagi, o le ā fai le nuanua ma fa'aailoga o lea feagaiga. O taimi uma e va'aia ai le nuanua, e manatua ai lea feagaiga.

ASO SA: Fepuari 16, 2020

MATAUPU 3: “O LE MOLIMAU A IOANE IA IESU.”

SINI : Ia a’oa’oina le vasega ia malamalama – o Ioane le molimau i le malamalama o Iesu, ina ia fa’atuatua i ai o tagata uma lava iā te ia.

TUSI FAITAU: Ioane 1: 1-16, 29 - 34

TAULOTO: Ioane 1: 6-7 *“Na ‘auina mai le tagata mai le Atua, o Ioane lona igoa. Na sau o ia e molimau, ina ia molimau i le malamalama, ina ia fa’atuatua i ai o tagata uma lava iā te ia.”*

FESOASOANI MO FAIAOGA:

Malō le onosa’i i la tatou galuega mo le lelei o fanau mo le lumana’i. O le fa’amanatu masani lava a le ofisa, ina ia tulei le faitaugā Tusi Paia a le fanau, ma va’ai pe i ai ni upu e lē malamalama ai le fanau e tatau ona fa’amalamalamaina. E ao foi ona silafia e lau Susuga i le faiaoga le mataupu ae e le’i fa’amatalaina i fanau. O le mautū ma le lava o le lua mafutaga ma le tusi faitau, o le faigofie foi lenā o lau mataupu. Manuia tele le tapenaga.

FESOASOANI MO LE MATAUPU:

I le fa’aulutalaina o le mataupu muamua o le evagelia a Ioane. O lo’o fa’apea mai “Ua liutino tagata le upu”. O lona uiga sa i le amataga le Upu, sa i le Atua le upu, o le Atua foi le upu. O le Atua o le ola, a’o le ola o le malamalama lea o tagata uma lava e pei ona molimau ai Ioane.

O Ioane le molimau: O mātua o Ioane o Sakaria ma Elisapeta. O le tagata na auina mai e le Atua ina ia molimau i le malamalama (Iesu) ina ia fa’atuatua i ai tagata uma lava iā te ia, ma talitonu i ai. O le isi vaega tāua o mea na molimau ai Ioane, o lona va’ai tino lea i le afio ifo o le Agaga Paia, na ia fa’alogo foi ma le manino i le si’ufofoga mai le lagi i le taimi na papatisoina ai Iesu.

1. O lo’o fa’ailoa mai i le fuaiupu 32 – 34 o le mataupu muamua. Fai mai Ioane
 - *“Na ou iloa le Agaga ua afio ifo mai le lagi peisea’i se lupe ua nofo i ona luga, ou te le’i iloa o ia, peita’i o ia na auina mai a’u e papatiso i le vai, ao ia na te papatiso i le afi ma le agaga”*
2. O le papatisoga na faia e Ioane:
 - Ua tapena ma saunia ai loto o tagata ia salamō mai a latou agasala. O le ala lea e ta’ua ai Ioane o le teuteu ala. O ia o le teuteu ala e afio mai ai le malamalama o Iesu. O le feau a Ioane, o le saunia ma tapena loto o tagata ina ia salamō e afio ai le Alii. O lana molimau lea i le liutino tagata o le Upu sa i le amataga, o le malamalama o le lalolagi.
3. E fa’apena tatou le fanau; e mafai foi ona avea i tatou ma molimau e pei o Ioane. E tatou te molimau ai i le tala lelei e ala i lo tatou ola usiusita’i ma faia mea e finagalo ai le Atua. O tatou o tagata ua omai e teuteu le ala ina ia susulu pea le malamalama o Keriso i tagata o e o lo’o i le pogisa. Ia manatua tamaiti; ua fa’atusaina Iesu o le malamalama, ona o Iesu e aumai ai mea lelei ma le ola i ai tatou.

ASO SA: MATI 01, 2020

MATAUPU 4: “O LE SAMARIA AGALELEI.”

SINI: Ia a’oa’oina le fanau ia malamalama, o uiga o le Samaria agalelei, o le faia lea o se galuega fesoasoani mo le isi uso a tagata.

TUSI FAITAU: Luka 10: 29 – 37

TAULOTO: Luka 10: 35. “O le taeao ua ia to a’e ai tenari e lua, ma avatu i lē e pule i le fale-talimalō, ua fai atu iā te ia, Inā e tausī iā te ia, ai se mea e te toe fa’atau ai, ou te tauī atu iā te oe pe ā ou toe sau.”

FESOASOANI MO FAIAOGA:

E momoli atu le agaga fa’afetai tele i ā outou Susuga i faia’oga le onosa’i i la tatou galuega. Manatua lau tapenaga ia ma’ea lelei ona faitauina le tusi faitau e te malamalama lelei ai i le mataupu. Ia aua nei galo ia a’oa’oina pea le faitau Tusi Paia a le fanau i le vasega lea. Tautuanā ni upu o i totonu o le tusi faitau e te silafia e faigatā mo le fanau, e tatau ona su’esu’e lona uiga ina ia fa’amalamalamaina. Fa’aaoga le vaiaso atoa e te tapena ai. Manuia le tapenaga.

FESOASOANI MO LE MATAUPU:

O le tala o le ā tatou talanoa ai i lenei taeao tamaiti, o le tala na fa’amatala e Iesu e fa’amalamalama ai i le tasi a’oa’o tulafono sa fa’a-fia-amiotonu o ia iā Iesu, ma fesili po o ai e lā te tuaoi? (E fautuaina le fa’amatala pea na’o le tala i le Samaria agalelei, ae lelei foi ona e silasila a’e i luga i le mafua’aga na fa’amatala ai e Iesu le fa’ata’oto lea i le Samaria agalelei (Luka – 10: 25 – 28), e te manimo lelei ai lava i le tala. E manaia le talanoaga a Iesu ma le a’oa’o lea na fesili iā Iesu, pe fa’apefea ona ia maua le ola e fa’avavau, a’o le fa’amamafa lava, o le galuega alofa na fai a e le Samaria na agalelei, o le a’oa’oga lelei lenā mo le fanau.)

Fai mai le tala – O le tasi tagata na alu ifo lana malaga mai Ierusalem e alu ifo i Ieriko. Ua maua o ia e tagata fao mea i le ala, ua latou ave’ese ona ofu ma fasi iā te ia ona latou sosola lea ae tia’i ai i le auala.

Tagata na ui ane i le ala o lo’o ta’atia ai le tagata ua tigāina.

1. **Ositaulaga-** tagata e fa’atinoina le taulaga.
 - Ua alu atu le ositaulaga i le ala ua ia iloa atu le tagata manu’a, o lo o ta’oto mai i le ala, ona ui ane ai lea o ia i le isi ala.
2. **Sa-Levi-** o le tagata fai-lotu.
 - E le’i leva foi ae alu atu le Sā Levi, ua ui ane o ia, ma iloa foi le tagata manu’a o lo’o ta’oto i le ala. Ua ia matamata i ai, ona ia ui ane foi lea o ia i le isi ala. E lei fesoasoani lava I letagata na fasia e tagata fao mea.
3. **Samaria Agalelei-** o le tagata ese.
 - O tagata mai Samaria tamaiti, o tagata ia ua ta’ua o tagata o nu’u ‘ese. O lona uiga, e lē nu’u fa’atasi ma tagata Iutaia. Ua alu ane le tagata Samaria, ua tau atu ai lea i le tagata o lo o ta’oto mai i le ala, ua toeitiiti lava oti.

FESOASOANI MO FAIAOGA:

E fa'atalofa atu i ā outou Susuga i faiaoga; malō le onosa'i ma le lava papale i le tatou galuega mo le lelei o fanau a le Ekalesia. E ao ona silafia e lau Susuga i le faiaoga le amataga o le tala iā Iakopo. O le na ua taumafai e 'oto'oto atu nisi vaega o le amataga o le tala mo le silafia, ae fa'amoemoe atu i se fa'aopopo a lau Susuga. E fautuaina le lava o le lua mafutaga ma le tusi faitau, e sili foi ona mana'omia le faitau o lau Susuga i mataupu o lo'o muamua atu, o le ā telē ai se malamalama i le tala iā Iakopo, ona e lē o se tala pu'upu'u. Ae o le saunia lelei ai lenā o lau Susuga ma faigofie ai le a'oa'oina o nai fanau laiti na. E lelei foi pe ā amata i nai fesili; po o ai lenei tagata o Iakopo? Ona fa'agasolo ai lea o lau tapenaga. Manuia le tapenaga.

FESOASOANI MO LE MATAUPU:

O le tatou tala i lenei taeao o le tala iā Iakopo. Manatua lea sa sola Iakopo mai lona uso o Esau. A'o lea la o le ā tatou talanoa, o lea ua toe foi Iakopo e feiloa'i ma lona uso matua o Esau. O Esau sa nofo i le nu'u o Seira i Etoma. Ina ua latalata ona o'o Iakopo ma lona aiga, ma ana auauna, ma ana lafu manu e tele, sa lagona e Iakopo le fefe ina ne'i toe tau mai e lona uso o Esau lana mea leaga sa fai muamua iā te ia.. (Manuia foi ae toe fesili poo le ā le mea na mafua ai ona sola Iakopo, ona toe fa'auau ai lea o le tala).

O le fefe o Iakopo na ia fa'amuamua ai ana auauna ma meaalofoa, o ana lafu manu ma ana oloa e ave iā Esau. Sa fa'atonu e Iakopo ē na muamua ia fa'apea atu iā Esau –“o lo o mulimuli atu lau auauna o Iakopo”. Ua nofo pea Iakopo i le togālauapi. Ua o'o i le po, ona ia tula'i lea ma ave ana avā e to'alua, ma ana auauna fafine e to'alua, ma ona atalii e to'asefulu ma le to'atasi ma la'asia atu le 'asaga o Iāpoka.

Ua fagatua Iakopo ma le agelu. Ua o'o ina ao, ua iloa e le agelu ua malō Iakopo iā te ia. Ona ia pa'i atu ai lea i le fa'iga o lona suilapalapa, ona se'e ai lea o le ivi.

Manuia ae fa'amamafa si talanoaga lea ia taofi mau e tamaiti.

Agelu: *“Tu'u mai ia o a'u a ou alu, auā ua ao”*

Iakopo: *“Ou te lē tu'uina atu lava oe, se'ia e fa'amanuia mai iā te a'u.”*

Agelu: *“O ai ea lou igoa?”*

Iakopo: *“O a'u o Iakopo.”*

Agelu: *“E lē toe ta'ua lou igoa o Iakopo, a'o Isaraelu, auā e pei o se ali'i ua e finau i le Atua atoa ma tagata, ma ua e manumalō.”*

Iakopo: *“Inā ta'u mai ia o lou igoa?”*

Agelu: *“Se ā le mea ua e fesili mai ai i lo'u igoa? Ona fa'amanuia lea o ia iā te ia i lea mea.”*

Fa'amanatu: O le suia o le igoa o Iakopo, o le fa'ailoga o le fa'amanuia a le Atua iā Iakopo ona o lona finau ma le tauivi, auā se lumana'i manuia o ia ma lana fanau, o le fa'amanuia o le ā leai se fe'ese'esea'iga i lō la va ma lona uso o Esau. O le ā maua le filemū e feiloa'i ai ma Esau. “Ona fa'aigoa ai lea e Iakopo lea mea o 'Penieli', auā ua fa'apea a ia, na ou iloa ai le Atua, ua ma fesaga'i lava, a ua lavea'iina a'u”

Uiga o Upu:

Fa'alaulelei: toe fa'alelei le va o ni tagata sa fe'ese'esea'i, teuteu se leaga

Togālauapi: nofoaga ua fa'atulagaina e nonofo fa'atasi ai mo se taimi tu'upoina.

Fagatua : tauiviga, pi'iga

Setusetu: savali fa'asapasapa, lē paleni le savali

Ua na memei: maso o lo o i le suilapalapa, uaua o le suilapalapa

Penieli: O fofoga o le Atua.

Isaraelu: O le Alii o ia i le Atua.

FESOASOANI MO FAIAOGA:

E lē uma le agaga fa’afetai i le Atua ona o lo outou soifua galulue mo le Atua ma lona finagalo i lea foi itu tāua o lana galuega. I le a’oa’oina o fanau a le Ekalesia mo so latou lumanai manuia, aemaise lo latou ola fa’atuatua ia tumau i le Atua Soifua. Ia fa’amalosiā pea fa’amolemole le faitau Tusi Paia a le fanau ma fa’amalamalama ni upu faigatā mo le fanau. O le mautū lava o lau tapenaga, o le masani lelei i le tusi faitau. Manuia lau tapenaga.

FESOASOANI MO LE MATAUPU:

Ina ua uma le oti o Mose, ona vala’au ai lea o le Atua iā Iosua le atalii o Nuno. O Iosua o ia lea sa mulimuli iā Mose, ma ua ia iloa ai le tele o mea lelei na a’oa’oina i ai e Mose. Tofia e le Atua Iosua; na te ta’ita’iina lona nu’u o Isaraelu, e sopo’ia atu le vai o Ioritana, ma o atu ai loa i le nu’u o Kanana. Sa folafola foi e le Atua le tele o lau’ele’ele o le ā o’o i ai le pule a Iosua ma Isaraelu. E pei o Lapanona, vaitafe tele o Eufirata, o le nu’u uma o sã Heti, e o’o atu i le sami tele, o le mea e goto ai le lā, e fai mo Isaraelu. Sa matuā fa’amanuia foi le Atua i le tula’i mai o Iosua e ta’ita’i le nu’u o Isaraelu.

Fetalai le Atua, *“e leai lava se tagata e tu ma tete’e i le ta’ita’iga a Iosua, ma e auai le Atua iā te ia i aso uma o lana ta’ita’iga.”* O le tofiaina o Iosua tamaiti, o le vala’auina mai le Atua, ona o lona ola usita’i ma fa’alogo i fa’atonuga a le Atua. Lea ua iloa e Iosua le lelei o le ola usita’i ma le fa’alogo; auā o lea ua tofia ai o ia e ta’ita’ia le nu’u o Isaraelu.

Uiga o Upu:

Sopoia: savavali i le isi itu.

Alofivae: pito i lalo o le vae

Ana’ana: usita’i, mata’u

GALUEGA FA’ATINO: Saili mai upu nei i totonu o le paso?

Ioritana, Lapanona, Iosua, Mose, tauagavale, Eufirate.

I	M	F	G	H	J	K	L	M	E
Z	O	X	C	V	B	N	M	Q	U
W	S	R	E	R	T	Y	U	I	F
O	E	P	I	O	S	U	A	A	I
S	D	F	G	T	H	J	K	L	R
Z	X	C	V	B	A	N	M	Q	A
W	E	R	T	Y	U	N	I	O	T
L	E	P	A	N	O	N	A	P	E
L	E	P	R	F	G	H	J	K	L
T	A	U	A	G	A	V	A	L	E

FESOASOANI MO LE MATAUPU:

Ua alu a'e Iesu i le mauga ona mulimuli atu ai lea o le motu o tagata e to'atele. Ona alu atu ai lea o le tagata lepela ua ifo atu iā te ia. O le fesili a le tagata lepela fai mai; **“Le Alii e, afai e te finagalo i ai e mafaia lava ona fa'amamā mai iā te a'u.”** Ona 'aapa atu ai lea o le lima o Iesu ua pa'i atu iā te ia ma fa'apea atu; **“Ou te loto i ai inā mamā ia oe”** Ona mamā ai lea, ma ua te'a le ma'i lepela o lea tagata.

O le fetalaiga a Iesu i le lepela, “aua nei ta'u atu i se tagata le mea ua faia iā te ia, a ia alu ma fa'aali o ia i le ositaulaga, ma avatu le taulaga na poloai ai Mose.” O le mana o Iesu fa'atasi ai ma le loto fa'atuatua o le tagata lepela, na faigofie ai ona ia malōlō ma te'a ese le ma'i lepela mai lona tino. Ua iloa ma mautinoa e le tagata lepela, e mafaia e Iesu ona ia fa'amalōlō iā te ia. Ioe tamaiti! ia tatou talitonu e leai se mea e faigatā iā Iesu, pe afai e moni ma fa'amaoni lo tatou fa'atuatua iā te Ia. Ia manuia tele outou le fanau.

GALUEGA FAATINO: Taligā fesili

1. O ai se tagata sa maua i le ma'i lepela o lo o ta'ua i le Feagaiga tuai? **Tali:** Iopu
2. O le ā le upu a le lepela na fai ia Iesu. **Tali:** “Le Alii e, afai e te finagalo i ai, e mafaia lava ona fa'amamā mai iā te a'u.”
3. A'o le ā le tali a Iesu? **Tali:** “Ou te loto i ai inā mamā ia oe”
4. Aiseā na faigofie ai ona malōlō le tagata lepela? **Tali:** Mana o Iesu ma lona fa'atuatua fa'amaoni.
 5. O le ā le tala mulimuli a Iesu i le tagata lepela? **Tali:** “Ia oe ne'i e ta'u atu i se tasi, a ia e alu ma fa'aali oe i le ositaulaga, ma avatu le taulaga na poloa'i ai Mose, e fai ma fa'amaoniga iā i latou.”
 6. Aua le noatia nisi fesili e te silafia e 'oa atili ai le fanau i lenei tala, a ia tautuanā, ia momoli lava i se ala faigofie ona malamalama ai tamaiti.

PESE: Lafo avega iā Iesu

Lafo 'avega iā Iesu E alofa iā te a'u Lafo 'avega iā Iesu E alofa iā te a'u Luga, luga, luga, luga, luga Luga, luga, si'itia Iesu I luga Lalo, lalo, lalo, lalo, lalo, Soli Satani i lalo	Cast your burdens unto Jesus, He cares for you Cast your burdens unto Jesusu, He cares for you Higher, higher, higher, higher, higher, Higher, higher, lift Jesus higher Lower, lower, lower, lower, lower, Lower, lower, stomp Satan lower.
--	---

A'OA'OGA:

1. O Iesu le foma'i sili mo tagata uma i le tino, mafaufau, atoa ai ma le agaga.
2. Ia malosi le ola fa'atuatua i le Atua e manuia ai o tatou la'asaga uma..
3. E o fa'atasi le ola fa'atuatua ma galuega fa'atino e maua ai le malōlōga.

TATALO: Fa'afetai tele le Atua i lau fa'asoa i le talalelei i lenei taeao. Ua matou mautinoa ai e leai se mea e faigatā i lau Afio. Ae matou te tatalo ia fa'amanuia fanau ma lō latou lumana'i, aemaise ia fa'amalamalama e le Agaga o lau Afio i ō latou loto; e faigofie lo latou lumana'i pe ā fa'atuatua ma le fa'amaoni i lau Afio.....Amene.

*****Ia manuia lenei Aso Sa*****

ASO SA: Mati 29, 2020

MATAUPU: “SU’EGA - 2”

SINI: O le fa’amoemoe lava o suega ua saunia atu, o le toe fa’amanatu ma fa’amautū i nai fanau, tala sa o latou a’oa’oina, ma gapātia ai a outou Susuga, ina ia taofimau ma saunia ai i latou i le aga’i atu i vasega i luga o le Aoga Aso Sa.

FA’ATINOGA O LE MATAUPU.

1. E pule lava lau Susuga i le fa’atinoina o le su’ega, pe auaua’i ta’ito’atasi ane tamaiti i lau Susuga ma fesili i ai, ia pe tali fa’atasi foi.
2. E talosaga atu ina ia fa’atino ma saunia lelei, ina ia uigā i fanau le mataupu o lo’o e tigāina ai. Ae maise lava, o le mafai ona manatua tala sa outou a’oa’oina, ma tali ane ai.
3. Ia manatua pea, o le vasega lea e le tusia ni a latou tali i ni pepa, ae tali ane lava tamaiti i lau Susuga pe ā e fesili iā i latou.
4. Fa’amolemole, ia fa’amaumau togi o nai tamaiti i sau api ua saunia lelei, e lē leaga foi pe ā maua ni nai fa’ailoga o nai fanau, latou te iloa ai o lo o tāua a latou galuega o lo’o fa’atino, ina ia fa’atupuina ai lo latou fiafia e auai ane i le Aoga Aso Sa.
5. Aua le taofia ni fesili e te silafia e malamalama ma taofi mau ai tamaiti, e ‘ese mai i fesili ua tu’uina atu. Saili pea i fesili ma tali faigofie, a ia lē ave’esea ai le uiga moni o le iloa o le tala.
6. Ua na o tala o le masina o Mati o lo fa’aaogaina i le suega lenei. E talosaga atu foi ina ia toe fa’aupu fesili ina ia manatua ai e tamaiti tala sa latou fa’alogo ai.
7. E manuia foi ae toe fesili i ai i ā latou tauloto sa a’oa’oina po’o manatua ma taofi mau. Fa’amanatu pea ia ta’u i matua e fesoasoani i le a’oa’oina o tauloto i Aso Sa uma.

Fesili:

1. O ai le tagata muamua na tau atu i le tagata na fasi e le ‘au fao mea? **Tali:** O le Ositaulaga.
2. A’o ai le tagata lona lua? **Tali:** O le Sā Levī
3. O ai le tagata na fesoasoani i lē ua puapuagātia i le ala? **Tali:** O le Samaria agalelei.
4. O ai le uso o Iakopo? **Tali:** Esau
5. O ai le igoa na sui ai le igoa o Iakopo? **Tali:** O Israelu.
6. O ai le tagata lea sa fagatua ma Iakopo? **Tali:** O le agelu a le Alii.
7. O le ā le uiga o le igoa o Iakopo? **Tali:** O le sisi’o i mea a isi.
8. O le ā le uiga o le igoa o Israelu? **Tali:** O le Alii o ia i le Atua.
9. Aiseā na mafua ai ona filifilia Iosua e ta’ita’i le nu’u o Israelu? **Tali:** E lē gata ina sa mulimuli iā Mose, ae sa fa’alogo ma usita’i i le Atua.
10. O le ā le upu a le lepela na fai iā Iesu? **Tali:** “Le Alii e, afai e te finagalo i ai e mafaia lava ona fa’amamā mai iā te a’u.
11. A’o le ā le tali a Iesu? **Tali :** “Ou te loto i ai, inā mamā ia oe”

Fa’ai’u e lau Susuga i nai pesepesega, o pese sa latou a’oa’oina i lenei masina, ina ia maua lelei e tamaiti. Ona saunia ai lea o se tatalo e fa’ai’u ai galuega o lenei Aso Sa.

*****Ia manuia le Aso Sa *****

ASO SA: Aperila 05, 2020. (ASO SA O LE LAUPAMA)

MATAUPU 8: “O LE MALAGA FA’ATUPU A IESU I IERUSALEMA”

SINI: Ia a’oa’oina le vasega ia malamalama, o le malaga fa’atupu a Iesu I Ierusalem, o le amataga lea o le aga atu i ona puapuaga.

TUSI FAITAU: Mataio 21:1 - 11

FESOASOANI MO FAIAOGA:

Fa’atalofa i tamaiti po’o ā mai i latou i leni taeao fou? Fa’amanatu, o leni foi Aso Sa ua ta’ua o le Aso Sa o le laupama. O lo’o fa’amanatuina e le ‘au-Kerisiano uma o le lalolagi, ma o le vaitau foi leni o le leni; o le vaitau o le aga atu o le Alii i ona puapuagā. Fa’amanatu masani lava a la tatou ofisa ia tautuanā le faitauina o le Tusi Paia a le fanau, ma le fa’amalamalamaina o upu e lē o malamalama ai i latou. Ia manuia tele lau tapenaga.

FESOASOANI MO LE MATAUPU:

O le tala fai mai ina ua latalata Iesu ma ona so’o i Ierusalem, ua o’o i Petefake i le mauga o Olive. Ona ‘auina atu lea e Iesu o nisi o so’o e to’alua, e tatala mai le asini o lo’o i le a’ai i luma atu. Na poloa’i Iesu i ona so’o ia e to’alua, a fai ane se tasi i le asini ona lā fai lea iai; **“Ua mana’o i ai le Alii.”** Ona o ai lea o so’o nei e to’alua ua tatala mai le asini. O le asini tamaiti, o lo’o fa’aalia ai le uiga o le agamalū.

Ua ti’eti’e Iesu i le asini ona latou aga’i atu lea i Ierusalem. Ua pepese ma sisiva tagata ma alalaga ma ua latou mulimuli atu i le Alii Fa’aola. Ua latou fa’apea atu; **“Osana i le alo o Tavita, ia manuia lē afio mai i le suafa o le Alii, Osana i mea aupito i luga.”** Ina ua o’o Iesu i Ierusalem ona fesilisili ai lea o tagata po’o ai lea tagata. Ona fa’apea atu lea o le motu o tagata; **“O Iesu leni le perofeta mai Nasareta i Kalilaia.”**

O le tatou tala lenā tamaiti. O le ti’eti’e atu o Iesu i le asini i Ierusalem o lana malaga fa’atupu lenā. O le amataga foi lea o lona aga atu i ona puapuagā o lo’o lumana’i e ala i le satauro. O se a’oa’oga mo tatou. O Iesu na ia aumaia le ata o le agamalū ma le loto maulalo. Ia fa’apenā tatou le fanau, ia tatou maua le agaga o le loto maulalo ma le agamalū. O ala ia tatou te maua ai le filemū ma le nofo lelei. O uiga ia o Iesu e tatau ona tatou fa’a-a’oa’o i ai. Fai mai Iesu ia tatou fealofani a ea?.

Uiga o Upu:

Fa’ae’e: tu’u i luga, si’i i luga **Osana:** Ia e fa’aola mai **pama:** la’au e ta’atele i Palesitina.

GALUEGA FA’ATINO: Saili le uiga sa’o o upu i le vaega ‘A’, o lo’o i le vaega ‘E.’

1. E lelei pe ā saunia e lau Susuga ni pepa e tusi ai le galuega ua ta’ua i luga, ona tufa lea i tamaiti e galulue ai fa’amolemole. Fa’atonutonu pea e lau Susuga le galuega ia iloa e tamaiti.

“A”

1. Osana:
2. Tama’i asini:
3. Ierusalem:
4. Iesu Keriso:

“E”

- O le a’ai o lo’o i ai le malumalu
- O le Alii Fa’aola
- O le fa’aailoga o le agamalū ma le loto maulalo
- Ia e fa’aola mai

E lelei foi ae amata ona ta'uta'u atu i tamaiti, o le totonugālemū lea o lo tatou fa'atuatuga i le Atua, 'o le maliu ma le toetu o Iesu Keriso mai le oti ma le tu'ugamau.' Ae tautuanā aua ne'i faigatā tele le gagana i fanau fa.amolemole. Manuia tele le tapenaga o le Eseta.

FESOASOANI MO LE MATAUPU:

O le ulua'i aso o le vaisapati i le vaveao. Na alu ai Maria le Makatala e asi le tu'ugamau o Iesu. Na va'aia e Maria ua leai se ma'a sa i le faitotoa o le tu'ugamau, ona ia tamo'e atu ai lea ma va'ai i totonu o le tu'ugamau, ua leai se tino maliu o Iesu. Ona toe tamo'e lea o Maria ma ta'u atu i nisi o so'o o Iesu, o Simona Peteru ma le tasi so'o na alofaina e Iesu. Ua latou o atu fa'atasi ma so'o i le tu'ugamau ma iloa ai ua na o 'ie na ufi ai le tino o Iesu, a ua leai sona tino i le tu'ugamau. Ua lē mautonu nei so'o ma Maria po'o ai ua ave'eseina le tino maliu o lo latou Alii o Iesu, o le taimi lea tamaiti, e le'i iloa e so'o ma Maria, o Iesu ua toetu manumalo o Ia mai le oti ma le tu'ugamau.

Ua toe foi nei so'o i ō la aiga, a'o Maria ua nofo ai pea o ia i le tu'ugamau ma tagi ai. A'o i ai Maria i le tu'ugamau ma le fa'anoanoa, sa ia fa'alogoia le leo o le tagata ua fesili atu iā te ia, pe aiseā ua tagi ai. E le'i iloa e Maria o Iesu lea ua fesili atu iā te ia. Na fa'atoa iloa lelei e Maria o Iesu ina ua ta'u atu e Iesu lona igoa o Maria. Na matuā fa'ateia Maria ina ua ia tilotilo lelei atu o Iesu lea la te talanoa. Ua toetu o ia. Ioe tamaiti, ua leai se tino o Iesu i le tu'ugamau, ua le o i'inei o ia i le tu'ugamau, a ua toetu o ia mai le oti.

Na tamo'e fiafia Maria ma ta'u atu i so'o o Iesu ua toetu Iesu. O le tala fiafia lea mo i latou ae fa'apea foi le lalolagi atoa. E ui i puapuagā sa feagai ma Iesu, ae le'i mafai ona to'ilalo ai lo tatou Alii Fa'aola. O le maliu ma le toetu mai o Iesu, o lona alofa ina ia fa'aolaina i tatou le fanau agasala. E ā la tamaiti? Pe fa'amata e talafeagai le agasala o le lalolagi ae oti ai fua Iesu?

Uiga o Upu:

Vaisapati: o le aso muamua ina ua uma le sapati. **Ofu sisina :** ofu papa'e

Galuega fa'atino: Ina ia mautinoa e faigofie ona manatua e tamaiti le tala, e matuā tataui ai ona taumafai a outou Susuga i faiaoga ma tamaiti e fa'atino le vaaiga lea o le tala i le mea na tupu i le toetu i le tala a Ioane. Pule pea a outou Susuga i le faiga e fa'aaogaina ai tamaiti, ae fesoasoani i ai outou i fa'amatalaga faigofie ina ia vave ona taofi e fanau le tala aua le toe galo.

Galuega faatino mai le fale mo le isi vaiaso (Home Work):

1. Ia tusi i ni pepa le galuega lea ona tufa lea i tamaiti e o e fai ane i le fale mo le Aso Sa o lumana'i, ae lava le fa'atinoga mo le Aso Sa lenei o le Eseta.
2. Ia ao a latou meaaoga ma togi, fa'amaumau, ma toe tufa i tamaiti e va'ava'ai i ai i o latou togi, ona fiafia lea e o ane i le aoga i Aso Sa uma.

Fa'atonuga: Faatumu avanoa o le parakalafa i upu o lo'o i lalo.

Toetu, ma'a, Makatala, vaisapati, Simona Peteru, fa'ate'ia, pogisa.

O le ulua'i aso o le 1 _____, i le taeao, a'o 2 _____ lava, ua alu ane ai Maria le 3 _____ i le tu'ugamau. Ua ia va'ai atu ua leai se 4 _____ sa i le gutu o le tu'ugamau. Ona ia tamo'e lea ma ta'u atu iā 5 _____. Ua tagi Maria ona ua leiloa po'o ai ua ave'eseina le tino maliu o Iesu. Peita'i na 6 _____ Maria ina ua fetalai atu Iesu iā te ia, aua ua 7 _____ manumalō o ia mai le oti ma le tu'ugamau.

ASO SA: Me 03, 2020

MATAUPU 11: “O LE FAFINE NA MA’I I LE MA’I PUNATOTO”

SINI: Ia a’oa’oina le fanau ia malamalama o puapuagā, o ma’i ma mafatiaga, e o’o i le Tagata, na o Iesu lava le foma’i sili, ma le vai fofō tatou te malōlō ai, pe ā moni lo tatou faatuatua i le Ali’i.

TUSI FAITAU: Mareko 5:25 – 34

TAULOTO: Mareko 5: 34 *“A ua fetalai atu ia iā te ia, Lo’u afafine e, o lou fa’atuatua ua e malōlō ai, inā alu ia oe ma le manuia, ma ia e malōlō i lou ma’i tigā”*

FESOASOANI MO FAIA’OGA:

Talofa tamaiti? O le tatou tala o le ā fa’amatala, ole tala i le fafine na ma’i i le ma’i punatoto sa fa’amalōlō e Iesu. O le fafine lenei fai mai le tala, ua leva ona ‘a’afia i le ma’i o le punatoto. E sefulu ma le lua tausaga o fealua’i lenei tinā ma le ma’i. Na saili fofō solo, ma ua tele ana tupe ma ana oloa sa fa’aaluina ai i le sailia o se fofō o lona gasegase. Peita’I, e le’i mafai ai lava ona manuia ai. Faamolemole lau usuga, pe afai foi e mafai ona e fa’amatalaina le ma’i punatoto i tamaiti, ua lelei tele. Ae mana’omia lou sa’ili’ili ni fa’aupuga ma ni fa’ata’ita’iga faigofie e fa’amatala ai. Ua e silafia le ma’i, e ma’ale’ale pe a faamatala, ae tatau, ona malamalama ai le fanau. E matuā manaomia lou faitau pea I le tala, ma faitau foi I ai le vasega, ina ia manino le sasologa o le tala ma mea na tutupu ai. Faamalamalama ni nai upu faigata I le tala mo le fanau faamolemole. Manuia tele lou alofaiva i le mataupu o lenei Aso Sa.

FESOASOANI MO LE MATAUPU:

1. Ua fa’alogo lenei fafine ma’i i le punatoto iā Iesu, ona alu ane ai lea o ia iā te ia. A’o i ai Iesu ma le motu o tagata, na alu ane lenei tinā ma lona manatu, se’i ona pa’i lava i le ofu o Iesu, e mautinoa lava e malōlō ai. Ua taumafai atu le tinā ma i’u ai lava ina pa’i atu i le ofu o Iesu. Fai mai le molimau a Mareko, na ona pa’i atu lava o le tinā lenei i le ofu o Iesu, ona utu loa lea o lona punatoto, ma ia iloa ai, o ia ua fa’amalōlōina. Ioe, ua malosi le tinā, ua te’a lona ma’i sa tigaina ai i le sefulu ma le lua tausaga.
2. Iesu Keriso: Ua iloa e Iesu ua alu ese atu le mana(malosi) sa iā te ia, ona ia faliu ai lea i tua ma fesili atu i le motu o tagata po o ai lea na pa’i ane iā te ia.
3. Ona tali atu ai lea o ona so’o iā te ia: *“Ua e silafia le motu o tagata e to’atele o lo o fetalomi mai i latou iā te oe, ae e te fetalai mai ea, Po o ai na pa’i atu iā te oe”?*
4. Iesu Keriso: Ua tilotilo solo pea Iesu e va’ai po’o ai lava lea na pa’i atu iā te ia. O le taimi lea tamaiti, ua lagona le fefe o le tinā ma’i i le punatoto, o lea na ia savali atu ai ma fa’apa’u i luma o Iesu ma ia ta’utino I le Alii, o ia na pa’i atu i lona ofu ona o lona ma’i e fia malōlō.
5. Ona fetalai atu ai lea o Iesu; *“Lo’u afafine o lou fa’atuatua ua e malōlō ai, inā alu ia oe ma le manuia ma ia e malōlō i lou ma’i tigā”*
 - Ioe tamaiti! ua manuia le ma’i punatoto o lenei tinā, ona o lona fa’atuatua, talitonu, fa’amaoni e manuia lona ma’i pe afai e tau lava o le ofu o Iesu e pa’i atu i ai. O le tinā ua leva ona pologa i le ma’i, a’o lea fa’atoā malōlō ona o le mana lavea’i o lo tatou Alii o Iesu Keriso.

FESOASOANI MO FAIAOGA:

Ia fa'amalamalama i fanau le uiga o le u'u e pei ona aumaia e le tusi faitau. Manatua e le o le u'u le fa'amamafa o le mataupu, a o le foa'i ma le fa'atinoga a le fafine. O le u'u e mafai ona fa'amatalaina o se suau'u ua fa'apitoa mo le tino. E pei foi ona i ai lava le u'u po'o le fagu'u a Samoa lava ia, e gaosia mai le popo, fa'atasi ma nisi o lau la'au ma fugala'au manogi ua tu'u i ai, ina ia sasala ma tosina lona manogi. Ia fa'aa'oa'o pea le faitau Tusi Paia a le fanau, aua le fiu fa'amolemole. Ia lava foi le lua mafutaga ma le tusi faitau, e faigofie ai lau galuega. Manuia tele le tapenaga.

FESAOSAONI MO LE MATAUPU:

1. O le u'u o lo'o fa'aaogaina i le tala o lenei taeao, e fa'amatalaina o le fa'amanogi (perfume). E fa'aaogaina e fa'amanogi ai le tino. O le u'u manogi e uiga 'ese lona sasala. E lē o fa'amatalaina lea tulaga i le tatou tala ma le tusi faitau. Peita'i, e mafai ona o tatou iloa ma fa'amatalaina lenei u'u manogi i sona manogi uiga 'ese ma sona aogā fa'apitoa. I le manatu o Iuta le so'o fa'alata, o se u'u e 'ese le taugatā. A taugatā se oloa, o i'inā o lo'o ta'u mai ai le tulaga (quality) o le na oloa.
2. Ua fai e Maria le mea sili mo lona Alii. Ua ia manatu ina ia foa'i ma fa'aaogā lana u'u taugata ma le manogi mo lona Alii o Iesu. O se faiga o lo'o atagia mai ai le tagata ua ia ave mea sili mo lona Alii. E mafai foi ona fa'apea, o lana taulaga lava lea i le Atua.
3. O mea tāua ma taugatā i so tatou manatu, o mea ia e tatau ona tatou fa'aaoga mo le finagalo o lo tatou Alii. Fetalaiga a le Alii. (f. 7-8) *“Tu'u pea ia iā te ia; ua teu e ia lenei mea mo le aso o le fa'ata'imuaga o lo'u tanuga. Auā tou te nonofo pea ma ē matitiva, a e tatou te lē nonofo pea ma a'u.”*

GALUEGA FA'ATINO: TALIGĀ FESILI

1. O ai e ana le u'u manogi o lo'o ta'ua i le tala? **Tali:** O Maria.
2. O le ā le galuega na fa'aogaina ai le u'u manogi? **Tali:** Na u'u ai vae o Iesu.
3. Aiseā na fesiligia ai e so'o le galuega na faia i le u'u? **Tali:** Manumanu i le u'u, ona e taugatā.
4. O ai le igoa o le so'o na ia fesiligia le galuega na faia e Maria iā Iesu? **Tali:** O Iuta le Sekara.
5. E lelei pe sese le faatinoga na faia e Iesu I le u'u taugata? **Tali:** E lelei toe sa'o atoatoa.

PESE: Suau'u i lau Lamepa

- | | |
|---|---|
| <ol style="list-style-type: none">1. Suau'u i la'u lamepa ia mu pea
Suau'u i lau lamepa out e tatalo
Suau'u i la'u lamepa ia me pea
Ia mu pea seia tafa mai o ata.
Tali: Pese Osana pese osana
Pese osana i le tupu o tupu
Pese osana pese osana
Pese osana i le tupu o tupu2. Give me joy in my heart, keep me singing
Give me joy in my heart, I pray
Give me joy in my heart, keep me singing
Keep me singing til the break of day.4. Give me love in my heart, keep me serving
Give me love in my heart, I pray
Give me love in my heart, keep me serving
Keep me serving til the break of day | <ol style="list-style-type: none">1. Give me oil in my lamp keep it burning, burning, burning
Give me oil in my lama I pray
Give me oil in my lamp keep it burning, burning, burning
Keep it burning til the end of day.
Chorus: Sing Hosanna, Sing Hosanna,
Sing Hosanna to the King of kings
Sing Hosanna, Sing Hosanna.
Sing Hosanna to the King of kings3. Give me peace in my heart, keep me resting
Give me peace in my heart, I pray
Give me peace in my heart, keep me resting
Keep me resting til the break of day.5. Give me gas for my ford, keep me trucking for the Lord
Give me gas fpr my ford I pray
Give me gas for my ford, keep me trucking for the Lord
Keep me trucking til the break of day. |
|---|---|

ASO SA: Me 24, 2020

MATAUPU: SU'EGA 4 (Mataupu 11, 12, 13.)

SINI: O le toe fa'amautūina ma fa'amanatu i fanau po ua taofi i ō latou mafaufau ma loto mataupu sa a'oa'oina ai i latou, i Aso Sa amata o lenei masina.

FA'ATINOGA O LE SU'EGA"

1. E tu'u atu pea le faitalia i ā outou Susuga i faiaoga mo le fa'atinoina o le su'ega e pei ona masani ai i su'ega ua mavae atu.
2. E iā te oe foi le pule i le aofa'i o togi mo le su'ega. Ae fautau atu pea pe ā e finagalo i ai, ina ia fa'amaumau togi o nai tamaiti ma fa'amatala lelei i ai le fa'amoemoe e faia ai su'ega, e lē o le saili po'o ai e sili, a ia aogā le o ane i le a'oga, ma fiafia atili ai i latou i le a'oa'oina.
3. E tāua foi ae silasila i tauloto o lo'o latou a'oa'oina, ina ia tauloto ma manatua Tusi faitau o ia tauloto.

FESILI: Ia auua'i ane fanau mo le taliina o fesili. E tali gutu a latou tali e lē tusia.

1. E fia tausaga na fealua'i ai le fafine punatoto ma lona ma'i? **Tali:** E sefulu lua. (12)
2. O le ā le mea na faia e le fafine na malōlō ai lona ma'i? **Tali:** Na pa'i i le pito ofu o Iesu ma lona fa'atuatua.
3. Ina ua pa'i le fafine i le ofu o Iesu, o le ā le mea na lagona e Iesu? **Tali:** Na lagona e Iesu ua alu 'ese atu le mana nai iā te ia.
4. O le ā le fetalaiga po'o le tala a Iesu na fai i le fafine ina ua fa'apaū faō i ona luma? **Tali:** "Lo'u afafine e, o lou fa'atuatua ua e malōlō ai, inā alu ia oe ma le manuia, ma ia e malōlō lou ma'i tigā."
5. O le ā le mea na faia e le fafine i le u'u manogi? **Tali:** Ua ia sasa'a i lona lauulu le u'u manogi, ma soloi ai a'ao (vae) o Iesu.
6. Na fiafia le 'au so'o o Iesu i le mea na faia e le fafine i le u'u manogi? **Tali:** Leai.
7. Aiseā na lē fiafia ai i latou? **Tali:** Ona o le u'u taugatā tele, a fa'atau e tolu selau tenari lona tau.
8. O ai Herotia? **Tali:** O le avā po'o le to'alua o Filipo.
9. O ai Filipo? **Tali:** O le uso o Herota, le tupu o Iutaia.
10. Na fa'apefea ona oti Ioane le papatiso? **Tali:** Na tipi 'ese lona ulu ma tu'u i totonu o le tanoa.
11. O le ā le a'oa'iga a Ioane iā Herota? **Tali:** E lē tataua ona toe nonofo ma Herotia le to'alua o lona uso.

Fa'ai'uga: A uma le su'ega o telē pea le taimi, ona fa'amalamalama loa lea i le fanau fesili ma o latou tali sa'o, ina ia latou fa'alogu ai ma iloa a latou tali na tali ane ai i lau Susuga.

Pesepesega: Ia toe faamanatu pese sa outou usuina I aso sa ua mavae, ia maua lelei.
Tatalo: Tatalo fa'atasi i lenei Aso Sa i le tatalo a le Alii.

*****Manuia le sauni atu i le lotu*****

ASO SA: Me 31, 2020. (Aso Sa o le Penetekoso)

MATAUPU 14: “FUA O LE AGAGA.”

SINI: Ia a’oa’oina le fanau ia iloa fua o le Agaga.

TUSI FAITAU: Kalatia 5: 22 – 26

TAULOTO: Kalatia 5: 22-23. “A o le fua o le Agaga o le alofa, o le ‘oli’oli, o le onosa’i, o le mataalofa, o le agalelei, o le fa’amaoni, o le agamalū ma le amio mamā, e lē fa’atulafonoina mea fa’apenā”

FESOASOANI MO LE FAIAOGA:

O lenei Aso Sa, o lo o ua tatou fa’amanatuina ai le aso na afio ifo ai le Agaga Pa’ia e fai ma fesoasoani i le ‘Au-Kerisiano, ma o lo’o fa’aauau mai lava i lo tatou vaitau. Ia fa’amatala i fanau le tāua o le galuega a le Agaga Pa’ia. Auā a aunoa i tatou ma le Agaga Pa’ia e i’uvale a tatou taumafaiga. E leai se manatu e fa’amatala i fanau ia le talafa’asolopito o le penetekoso, ae ia amata i latou i le taumafai e fa’alogo, ma iloa amioga e tatau mo le tagata e ola i le agaga e pei o le mau a le aposetolo. Faitau pea le tusi faitau e tata’i i ai mafaufau o nai tamaiti. (f: 25). Manuia lau tapenaga ma le galuega o lenei Aso Sa.

FESOASOANI MO LE MATAUPU:

O lo’o tautala Paulo fa’atatau i lenei lisi o se mea atoa e tasi, o se fua e tasi. O faamoemoe lea o fua o laau aina, mea moni, ina ia mafai ona fua lelei mai e fafaga ai tagata ua galala i le fia ‘aai. Peitai e ia I foi taimi e lūlūina ai le fua o la’au ‘aina ma afaina ai le lumana’i. O fua o la’au ‘aina, e tosina gofie i ai le va’ai; tatou te fe’a’ei i luga o aupā e tau mai pe ā pula, ma totogi se tupe e fa’atau ai, e ui ina ua afifi i pepa i’ila.

1. Ae ai se manaia ae tutusa lo tatou naunau ma lo tatou manana’o i fua o la’au ‘aina, ma lo tatou naunau i fua o le agaga. Auā o le naunauta’iga foi lea o le Aposetolo Paulo i le Ekalesia i Kalatia ma le ‘Au-Kerisiano. (f.25) *“Afai ua tatou ola i le Agaga, ia tatou savavali foi i le Agaga.”*
2. E 9 le aofa’iga o fua o le Agaga. [Kalatia 5: 22-23]
 - Alofa, ‘oli’oli, filemu, onosa’i, mataalofa, agalelei, fa’amaoni, agamalū, ma le amio mamā.
3. O le Agaga Paia foi, e fa’amalosia ma fesoasoani i o tatou tagata.
4. O le aso lenei o le Penetekoso, o le aso e fa’amanatu ai le afio ifo o le Agaga Paia i luga o ulua’i Aposetolo, ma fai ma fesoasoani sili mo tagata uma.
5. O le isi lea peresona o le Atua. [Le Atua le Tamā, le Alo, ma le Agaga Paia].

PESE: Spirit of the living God

1. Spirit of the living God, fall a fresh on me
Spirit of the Living God, fall a fresh on me
Melt me, mold me, fill me, use me
Spirit of the Living God, fall a fresh on me.

ASO SA: Iuni 14, 2020

MATAUPU 16: “O KITIONA LE TOA”

SINI: Ia a’oa’oina le vasega ia malamalama e vala’auina e le Atua le tagata fa’atauva’a e fai ma ana auauna.

TUSI FAITAU: Fa’amasino- 6:11 – 18

FESOASOANI MO FAIAOGA:

Talofa i lau Susuga i le faiaoga. Fa’afeiloa’i le fanau ma fesili po’o ai le tamaitiiti ua uma ona fai se ti o le taeao alu atu ai i le aoga? Fesili po o ai na te manatua le mataupu o le aso sa ua mavae? O ai na te fa’amatalaina mai le uiga o le upu Toa? (O se fesili e amata ai le mataupu e tata’i mai ai manatu o tamaiti, ae pule lava lau Susuga a le faiaoga). O le toa o se tagata e malosi le tino, e lē pala’ai le loto, toe lelei le mafaufau. E lē o se toa le tagata mālō vale ma so’ona fai mea leaga e a’afia ai nisi tagata. O le toa fai mai e na te pulea lelei lona loto.

FESOASOANI MO LE MATAUPU:

1. O Kitiona o le atalii o Ioasa le sa Apieserū. O Kitiona sa ia sasa saito i le mea e soli ai vine ina ia lilo ai Mitiana. Ua fa’aali atu le agelu ma fa’apea atu iā Kitiona; **“Oe na le toa malosi, o iā te oe le Alii”**. Ua tali atu Kitiona i le agelu; **“E! le Alii e, se ā le mea ua o’o mai ai nei mea uma iā te’i matou; o ifea ona vavega na ta’u mai e o matou tamā iā te’i matou”**
2. E le’i mafaufau Kitiona o le ā filifilia o ia e le Atua e fai ma toa e alu e tau le taua ma Mitiana. Peita’i, o le vala’auina o Kitiona o le fe’au lea mai le Atua. Ua tu’u i ai e le Atua le malosi, o le poto ma le mafaufau lelei, ina ia lavea’iina Isaraelu mai lima o Mitiana.
-Fai mai upu o le tali a Kitiona; **“fa’auta mai, ua topito ona fa’atauva’a lo’u aiga i Manase; o a’u foi, o le aupito itiiti i le aiga o lo’u tamā”**
-Ona tali lea o le agelu; **“Auā ta te fa’atasi lava ma oe, e te fasia foi Mitiana, e peisea’i o se tagata e to’atasi”**
3. Ua lagona le toa o le loto o Kitiona ona ua ia mautinoa, o le ā ‘au fa’atasi o ia ma le Atua. Ua malosi foi lona mafaufau auā o le ā fesoasoani le Atua i le fa’ataunu’uina o le taua. Na faia e Kitiona le taulaga e fa’afetai ai i le Atua, ona o lona filifilia o lona fa’atauva’a e fai ma ana mea faigaluega.
4. Fa’amolemole ia sailiili ma fa’amalamalama ni upu o le tusi faitau e lē malamalama ai tamaiti.

O le tala lenā tamaiti; o se a’oa’oga lelei mo tatou. O tatou uma e filifilia e le Atua e fai ma toa i le talalelei, i totonu o tatou aiga, nu’u ma le Ekalesia.

GALUEGA FAATINO: Ta’aloga o le Mate Mai

1. Mate mai po’o ai le toa lea na fasia Koliata i le ma’a-tā? **Tali:** O Tavita.
2. Mate mai po’o ai le toa o Filisitia? **Tali:** O Koliata.
3. O ai le igoa o le toa lea sa tatou talanoa ai i le taeao lenei? **Tali:** O Kitiona.
4. O ai le toa o le talalelei i nu’u ‘ese? **Tali:** O Paulo.
5. O ai le toa na fa’aolaina le lalolagi? **Tali:** O Iesu.

FESOASOANI MO FAIAOGA:

O le Aso Sa foi lenei e fa'ai'uina ai mataupu o lenei 'afa tausaga fa'a-le-a'oa'oga. Malō lava le fa'amalosi i lau Susuga le faiaoga i au tapenaga i le aoga a le fanau. E leai se tusi e sili atu nai lo le Tusi Paia, e te faitau ma malamalama ai, aemaise le fa'alagolago i le fesoasoani mai o le Agaga o le Atua. Fautuaga masani tautuana le faitauga Tusi Paia a le fanau, ma va'ai pe i ai ni upu e fa'amalamalamaina. Manuia tele le tapenaga.

FESOASOANI MO LE MATAUPU:

O le fanau mai o le tama o Isaako, o se mea sa folafolaina e agelu sa asiasi iā Aperamo ma Sara. Ua leva ona nonofo fa'atali lenei aiga i se aso e o'o mai ai lea fa'amanuiaga i lo la aiga. I le tusi faitau ua fa'atautu mo tamaiti i le vaega tonu o fai i ai le mataupu. Ua ta'oto le amataga i le vala'au tofotofa a le Atua iā Aperamo, ua ta'oto foi le vaoia o taulele'a e fa'atali atu i le aso lona tolu o le savaliga, ae o le ā tu'u sa'o loa le fa'amatalaga i le mataupu.

1. O le tofotofaina o le fa'atuatua o Aperamo: O lea ua fa'ailoa mai e le Atua lona finagalo i le atalii fa'apelepele o Aperamo, ina ia 'ave e faitaulaga atu ai i le Atua. Na silafia lelei e le Atua ua na'o le to'atasi le atalii'i o lana auauna o Aperamo, peita'i, sa ia tofotofa atili le malosi o le fa'atuatua o lana auauna o Aperamo.
2. E leai se upu e tasi na tali atu ai Aperamo i le Atua, a ua faia mea uma ma lona usita'i. Ina ua fa'ataunu'u e Aperamo le finagalo o le Atua ma le talitonu atoatoa; ona ia aumaia lea o le tama'i mamoe e sui a'i Isa'ako.
3. Agelu: Sa ta'utino mai fo'i e le agelu iā Aperamo i lea lava taimi. *“auā ua ou iloa nei ua e mata'u i le Atua, ina ua e le taofia lou atalii, o lou atalii e to'atasi, a ua e tu'u mai iā te a'u.”*

Fa'amanuiaga:

O le ma'ea ai o le osiga o le taulaga i le mamoe na foa'i mai e le Atua, sa fa'amautinoa ifo ai e le agelu iā Aperamo e fa'apea Ua tautō le Ali'i iā te ia lava, ona o lea mea ua faia e Aperamo iā te ia. Ua fai ma pine o lona fa'atuatua ma lona talitonu fa'amaoni. Ona fetalai lea o le Atua e ala i lana agelu; *“O le ā ia matuā fa'amanuia iā Aperamo, e to'atele lana fanau e pei o le oneone o le matāfaga ma fetu o le lagi, e manuia i lana fanau nu'u uma o le lalolagi.”*

O le mavae o ia mea, na toe fo'i ai loa Aperamo ma Isa'ako ma taulele'a i lo latou nu'u o Peresepa. O le a'oa'oga foi lenā mo tatou le fanau. Ia tatou fa'alogu ma usita'i i o tatou mātua.

Uiga o Upu:

1. **Tofotofa:** suesue pe tumau le faatuatua o Aperamo i le Atua pe leai.
2. **Fata faitaulaga:** O le fata e susunu ai luga taulaga
3. **Fa'aafu:** O fafie ua susunuina ma ua latalata ina liu malala uma..
4. **Polo:** o le upu fa'aaloalo e ave i le naifi
5. **Nifo:** o seu o le mamoe
6. **Vavega:** o se mea ofoofogia e le masani ona tupu, e seāseā foi ona va'ai i ai ni tagata.

GALUEGA FA'ATINO: •Fai se fa'atinoga pu'upu'u o le tala. Amata mai ina ua vao'ia taulele'a ae na'o Aperamo ma Isa'ako i le mauga o Moria e osi ai le taulaga. Ia fa'atino e tamaiti, a'o fa'amanino ma fa'atonutonu e lau Susuga. O le auala lelei lea e maitau gofie ai e fanau le tala ma malamalama ai. E lelei pe ā fa'amatala pea e lau Susuga, ae fa'atino le fanau. Manuia le fa'atinoga.



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org